

# **HILIPI NUMUNO EBEKU' IZESU' EVENELE MINANI' NETI LUHUVO NITE' PAULO' GIZE-NGIDINE'**

**Izesu' Evenele Hilipi Ebeku' Minani' Neti Luhuvo  
Nite'Paulo' Gize-ngidingumu' Gomu' Gataa' Gamazi**

Mene luhuvo nite' nene aposolo' Paulo' gizine' ve. A'mine Paulo' monovo'vemu' nene Aposolo' bukuu' nene gatelesane. Ido' Izesu' Kilisito' evenele zuho Loma ebeku' minani' neti luhuvo nite' Paulo' gize-ngidingumu' gomu' gataa' gamazi gizuningukisi nene ei' Paulo' monovo'vemu' nene ma gatelesane. Ido' Paulo' luhuvo nite' mene gizine' nene Izesu' evenele zuho Hilipi ebeku' minani' nene gize-ngidine' ve. Hilipi ebe' nene Loma velite gizebo ani' polovinisi Makedonia neu' minine'. A'mine polovinisi neuti' nene izi huki disitiliki seta've seta've lili' ani'. A'mine disitiliki nene ne'mino minine' ve: Makedonia 1 ido' Makedonia 2 ido' Makedonia 3 ido' Makedonia 4 lo minine' ve. A'mine ebe' gahevela nene ngoli moni gihaa' ani' ve. Makedonia aleve ingine nGiliki aleve minani'za Loma veti gizebo ve'ine naba ne'mo Loma ve ado' ami gono'nidoti' osu' likeve muki' nene Hilipi ebeta vi minilizave lo ngimisele huline' ve. nGimiselo Loma ebeku' minine' ngamani ne'mine gehepeve di soto' ikevo a'mine ebeto' gizebo ilive lo gele ngimine' ve. Nemu' nene a'mingu' minani' aleve muki' ingine nGiliki loutokisi ido' monovolokisi e'metami asi Loma loutokisi monovolokisi e'metilizado' o minine' ve. Soza o'mosolo' e'meti minani'. Zuda aleve linge ma a'mingu' minani'za mono' numuno'ine giziliza votigilelo' lisihе' i minamani' ve. Misubo naba' naba' Zulopu ve laa' nangu' numuno ebe' muki' minanguti' Hilipi ebeku' nene Paulo' aza gana' api' ogo Izesu' gamazi've lamine' nene lo soto' ine' ve. Paulo' aza a'mida vine' nene vamuto' Makedonia ve mal'i'mo ezemu' nene Makedoniala ogo hize ele' o-ledezo lo nolivo ningو nemu' Asia Maino (Minor) misubouko minine' ebe' Toloasi neu' ongo mono minine' nene hulo guvo nosolo' ledo vo a'mida vine' ve. A'mine Hilipi ebeta vo hetelo mino gamene ma vene' linge ma ingine O'mosola lolone li nosolo' di nubuho igi nizavo a'mido' vo Izesu'nimu' lo-ngimine'. Lo-ngemavo vene' ma gulive Lidia' nesi ido' eze zuho numuno hamoku' maka' ingaa' ave nesi nene lu'ine di velepe' izi Izesu'

evenele zuho lili' ani'. Mine do vo alinge' nene Paulo' aza alungo mali'mi lulouti' sikalahu' goloso do huline'. A'mine sikalahu' goloso ne'mo a'mine alungo nene amuzo emavo alinge' soto' o-ngedeline' initekumu' nene evene' lo-ngemaa' ine'. A'mine alu nene evene' maliti goboni alu minine' nenako nemu' nene ingine evene' ma engito' soto' o-ngedeline' initekumu' nene a'mine alu ne'mo lo soto' ogo lo-lemelive likevo gizebo i-daa' ave nete meni naba daa' ani' ve. A'mine sikalahu' goloso nene Paulo' imisele hulidoti' a'mine alu aza alinge' soto' iline' initekumu' lo soto' oga' ine' amuzo've nene osu' line' nenako nemu' nene gizebo i-daa' ave ingine Paulongi Silasingimu' ngizebolo' goloso molavo nala' numungu' huli-ngidani'. Huli-ngidani'za O'moso'mo lavo mimi' ogo nala' numunoli'mi akahe nene izo si'zine'. Ne'mine id'i'mo nala' numudo' gizebo ve ma lulo do velepe' izo gele ele'vole' ogavo ido' Paulo' Izesu'nimu' lo-ngemavvo eze venele izipahala zuho nesi lu'ine di velepe' izi Izesu' evenele lili' ani'. A'mine mene gamazi mukikumu' nene Aposolo bukuu' laka'ni 16 neu' nene gatelesane. Neloti' mine do vo Paulo' aza Hilipi ebeku' gamene vaitile gidini vine'. Izesu' evenele zuho Hilipi ebeku' minani' nete Paulo'ni lu'ine imi ido' gamene masi nene O'moso'mi gono dalingumu' hize ele' i-di inite' imaa' ani' neloti' nene gamene ha'na ogo vavo ido' Paulo' Izesu' gamazi've lamine' evene' lo-ngiminguu' Loma ebeku' nala' numungu' huli-dikevo neivo gohi inite' ma huli-dani'. Ve ma gulive Epahalodito' ve lo minine' ne'mo a'mine inite' nene do vo Paulo'ni emo hize ele' o-delesa ha minine'. Alinge' nene a'mine ve aza inite' gize do mo helaato' minine'. Izesu' evenele zuho Hilipi ebeku' minani' ingine a'minemu' gilii ga'ine muki' gilani'. A'mine Epahalodito' aza a'mine ga'ine muki' gilangumu' nene gelo azasi geni biline'. Ne'mine ingumu' Paulo' aza Hilipila gohi imisele hulolosa gala giline'. Izesu' evenele zuho Hilipi ebeku' minani' nete inite' huli-dani' nene dosa mulunou' lamine' gilingumu' lo-ngemelesa luhuovo nite' gize-ngedo do vo ngemelive lo Epahalodito'ni imine'.

A'mine luhuovo niteku' nene Hilipi aleve inite' huli-dangumu' tangezo' ve lo-ngedoo a'mido' imine' molo ti' lo-ngimine': Nala' numungu' minuvoni' ne'mo Izesu' gamazi've lamine' buu lo moneline' aka've nene hize tilamive. Asi a'mine nala' numungu' minuvoni' ne'mo buu lo moneline' aka've nene do ngolo' line' ve. Ne'mine ogavo a'mine Izesu' gamazi've lamine' nene ngamani naba'mi numu've nabaukisi dizo vine'. A'mine inite' eito' soto' ine' ne'mo Izesu' evenele zuho linge ma nesi nene api' igi Izesu'nimu' amuzo mili li soto' ani'. Aza gilivo nala' numunguti' nene huli-nidikevo heta voloni' ogave lo gelo lo-ngimine'. Ne neine'za eze gilivo naba o minine' inite' nene Loma vete nala' numunguti' huli heta i-dilizahae ido' bili hililizahae ilizangu' aza ogo molo iline' monovo ne'mo Kilisito' gulive do hozi liliive. Ido' nala' numunguti' huli heta i-dilizahae i-damilizahae nene ha ilisaha aza Hilipi aleve ingine Izesu' gamazi've lamine' lovo i imaa' ave nene gili ngimami ha amuzo mili minilizangumu' geleloni' nene lamine' oloseive lo gelaa' ine'. Nemu' nene ingine mulu'ningu' geni amivo Kilisitodo' gi'mizi amuzo mili minilizado' o neive lo lo-ngimine'. Ido' Kilisito' mine'mo lemo minine' ne'mini inginesi mini'mi limi minilizangumu' lo-ngimine'. Kilisitokisi O'mososi lisihe' i minasine'za Kilisito' aza a'mine O'mososi lisihe' o minine' mo'mosi've nene hulo haza evene' lolo' ogo lihimelo' ve gelo leli' lihimetemu' lohoto' zalo'

hiline' ve. Ne'mine ingumu' nene lingine nen'i lo-lengemelodo' gili divo' minilo lo lo-ngimine'. Ne'mine lo ti' lo lo-ngidine': Naza lengikumu' mulu'neu' lamine' gelelove lo gele nouve. Ido' ne'mine olongumu' nene lingine lishe' lamine' minilo.

Neloti' nene ingine nadii nizahе nemu' vo ningelive lo Timoteo'ni imiselо ido' Epahalodito'ni nesi nene gohi engita imisele hulolosuve lo lo-ngimine'. Ne'mine lo alinge' nene luhuvo nite've nene gize osu' line' giline'za gohi lo-ngeimeline' gamazi ma omo galalo' ogavo imine' molo ti' lo line': Izesu' evenele zuho gehepeve lili' ili ma nene okodine lolovo hukilo laa' avemu' nene ehe' igi minilizave lo ga'ine dani'. Izesu' evenele zuho ingine nene evenelite oko'ine losuvola ani' initeto' nene gili ele'vole' isa'mave. Ne'mine lo ei' monovo'vemu' gohi lo ga'ine ine'. Ado' a'mine okode losuvolo' oga' init'e vai' nevo'mine nene eita miningumu' nene lo-ngimine'. A'mine initeto' ha gele ele'vole' iline'za Kilisito'ni do minaa' ne'mo nene a'nemine init'e muki' nene ivile' goloso o neine' nenako nemu' a'mine init'e muki' nene mehe'nela molokuve lo lo-ngimine'. Nemu' idise gamenela nene Kilisito' gono dadot'i Okulumokukoti' minevo' minevo' ngemeni dameni dalizave lo O'moso'mo asi lo-ngimine' nene dalosa nemukovo' gelaa' nouve. Ne'mine lo ti' lo line': Ne'mine ine' ne'mini inginesi a'mine'mine ilizave lo line'.

Neloti' nene vene' ma lolize gamazi li minasine' nene hulilisive lo lo-ngedo ido' Hilipi aleve ingine ngolize izivo' mini ido' init'e laminekumukovo' gili minilizave lo lo-ngimine'. Ne'mine lo ingine init'e huli-dangumu' mulunou' lamine' goloso gilingumu' lo-ngemo ngopo'ni lo-ngidine'. Luhuvo nite've nene mese' aseka lo-ngedo no'noho' gamazitunu' gize osu' line'.

**Hilipi Ebeku' Izesu' Evenele Minani' Nene Geke'  
Lo-ngedo Paulo' Gize' Gamazi**

**1** <sup>1</sup>Paulo' nazasi Timoteokisi Izesu' gelekele' ve minusive netise nene makato' mino lengi' O'moso'mi evenele Izesu' Kilisitoda gi'mizi minave Hilipi numuno ebeku' nizani' muki' nesi ido' mono' gizebo vetinesi ido' mono' gonolo' vetinesi lengikumu' nene luhuvo nite' mene nogize-lingiduze. Ningilo. <sup>2</sup>O'moso metehosi ido' Guvetesi ve Izesu' Kilisito' nesi nasahili' i-lingidikesivo ne'mo lengi' muludgingu' nene hongu minivo mine lamine' igi minilizave lo O'mosola noluve.

**Paulo' Aza Luhuvo Nite' Gize-ngidive Hilipi  
Alevemu' O'mosola Line' Gamazi**

<sup>3</sup>Naza lengikumu' giluvoni' gamenelo' gamenelo' nene O'moso'nela isaa' neve lo laa' nouve. <sup>4</sup>Ido' a'mine lengikumu' O'mosola laa' nouvongu' nene gamene gamene nolizesi minosavo' nene laa' nouve. <sup>5</sup>Ne'mino laa' nouvoni' nene nanitekumu' ve. Lingine gana' api' igi gamazi lamine' giladot'i mine'mo dizo idise nonida neve a'mine gamazi lamineli'mi gono noduvongu' nene hize ele' i-nidaa' ani' nemu' nene

ne'mino O'mosola nolize izo laa' nouve. <sup>6</sup>Naza lengikumu' nene ti' lo gele mu'musi' o nouve: Lengiku' api' ogo gono lamine' nodave O'moso ne'mo nene gono do do vo neivo Izesu' Kilisito' aline' gamenela a'mine gono nene vo pele gehepeve oloseive. <sup>7</sup>Ido' lengi' nene lu'neu' homi do molo nouvon'i ma nene nizanako naza lengikumu' ne'mine lo gele mu'musi' o nouvon'i nene mo lisihe' lamine' o neive. Ee, O'moso'mo nasahili' o-nedo gono nimine' noduvongu' nene lingine mukito' hize ele' i-nidaa' ani' ado' nala' numungu' nouvongu' mesi ido' gamazi lamine' di'mi limaa' aveti gamazi'ine do'mo lemoo gamazi lamine' nene do'mo dizosa a'mine gamazi'mi amuzo've do soto' uvongu' nesi nene hize ele' i-nidaa' ani' nenako nemu' lengi' nene lu'neu' homi do molo nouve. <sup>8</sup>Ee, Izesu' Kilisito' lulo limine' ne'mo do ote-nedavo aza oga' neine' ne'mino mulu'neu' homine lengikumu' nene huhu lo gele nouve. Neve nene mo lamineto' noluvoni' nene O'moso'mo gele neive. <sup>9</sup>Ido' lengikumu' O'mosola luvongu' nene ti' lo laa' nouve: Lingine lutine ngemaa' monovotine nene naba o'mo vo neivo gatine gili nge li inite' ningi hehe laa' monovo di minilizave. <sup>10</sup>Ado' monovo ato ato' muki' ize' mili monovo ma ngivile' igi lamine' gehepeve minani' monovo nene di kegesi ningi dalizado' lisihe' i minilizangumu' nene lingine gatine gili nge li inite' ningi hehe laa' monovo di minilizave lo laa' nouve. Ido' lingine ne'mine ilizadot'i nene Izesu' Kilisito' aline' gamenela nene lingine lutingu' goloso monovo nomivo okodida gamazitinesi nomivo minikevo <sup>11</sup>monovo lisiheli'mi gihile've Izesu' Kilisito' do soto' o-ledaa' neine' nene lengita vai' laavo a'minem'u nene evenelite O'moso di hozi li opo'ni lilizado' lisihe' o mineleseive lo laa' nouve.

**Izesu' Kilisito' Gamazi've Lamine' Nene Paulo' Naza  
Galapuso Numungu' Minuvongukisi Geli Geli Ogo Hize  
Ele' Ogo Minaa' Nouvon'i Ne'mini Hilipi Aleve Nene  
A'mine'mine Igi Minilizave Lo Paulo' Line' Gamazi**

<sup>12</sup>Neze zuhokizo, nenita soto' ine' inite' mene gamazi lamineli'mi aka've nene hize tilivoba asi gamazi lamine' hize ele' ine' nenako nemu' nene lingine gililizave lo gelosa nolo-lingimuve. <sup>13</sup>Ee, naza nalato' nouvon'i nene Kilisito'nimu' nouvon'i nenako nene mo soto' o neivo mela Kaesale' numu'velo' gizebo iga' ani' ami pilisi ve mukilitesi ido' evene' linge mukikisi nene mo ningi gili osu' li nizave. <sup>14</sup>Ido' nalato' nouvon'i ne'mo nene leze zuho linge muki' nete nene Guvelesi vemu' gili mu'musi' i minani' nene naba goloso ogavo ingine ngehelele izamivo amuzo mili Kilisito' gamazi nene li soto' iga' nave.

<sup>15</sup>Ido' evene' linge malite Kilisito' gamazi've li soto' iga' naani' nene nenikumu' mulu'ningu' goloso o minivo nen'i nivile' ilisa nene laa' naani'za linge ma nete Kilisito' gamazi've li soto' iga' naani' nene lu'ine

laminetoti' gehepeve li soto' iga' naave. <sup>16</sup>Ee, ingine Kilisito' gamazi've  
 li soto' naani' nene naza nala' numungu' nouvon'i me'mo gamazi lamine'  
 nene alete molo-delive losa O'moso'mo nele'mize molavo nouvongumu'  
 nene gili mini lu'ine nimisa li soto' naaha <sup>17</sup>linge ma meuko luve nete  
 nene gamazi lamine' li soto' naani' nene lu'ine laminetotikovo' naavoba  
 asi ingine nene Paulo' nala' numungu' neingu' nene geni gohi masi do  
 imine' molo-delone liisa engi' oko'ine di dizilisavo' gamazi lamine' nene  
 li soto' iga' naave. <sup>18</sup>To' o monilize. Gamazi lamine' lu'ine avileloti'  
 abeleni igi li soto' ahe ido' lu'ine lamine' gehepeveloti' nene li soto' ahe  
 ne'mine mana'mine adotikisi nene mo Kilisito'nimu' li soto' naave loosa  
 nemu' nene nolize izaa' nouve. Ee, a'minem'u nene nolizevo' ize'mo vo  
 minelesuve. <sup>19</sup>Ido' naza nene nolize ize'mo voovo' minelesuve noluvoni'  
 nene nanitekumu' ve. Lingine nenikumu' ve li O'mosola laa' naavo ido'  
 O'moso'mi Sikalahuli'mo hize ele' o-nedaa' neivo neine' ne'mo nene idise  
 inite' soto' o-nede neivo nouvonguti' nene ha do nu' izeleseive lo gele  
 nouvongumu' nene nolize ize'mo voovo' minelesuve. <sup>20</sup>Ee, naza novozo  
 ngomosi helamo mino gamene gamene oga' uvodi'mine ogo idisesi nene  
 ha a'mine'minevo' ogo gamazi nene lovo' kiselevo' ogo lo novo neni'  
 oko'nedunu' inite' ogo molo oloni' muki' ne'mo Kilisito'ni nene do naba  
 o-deleseive. A'mine nene ado' minevo' alevo' ogo ha minelohe ido' nibili  
 hilikevo helelohe olonikisi Kilisito'ni nene ha do naba o-daakovo' olosuve  
 lo gele mu'musi' o nouve. <sup>21</sup>Nenikumu' ne'mine noluvoni' nene neemu'  
 noluve: Naza minevo' alevo' ogo mine do voloni' nene Kilisito' nenita  
 mine molo neivosa eikumukovo' nene minevo' alevo' olosuve. Ido' helo  
 voloni' ne'mo nene minevo' alevo' ogo mineloni' nesi ivile' ivosa lamine'  
 golosou' vo minelesuve. <sup>22</sup>Ne neiha oko'ne'vesi ha minevo' alevo' ogo  
 mine do voloni' nene gihile vai' izeline' gono nene dalosuvonako nemu'  
 nene heleloni' akalo' e'metelove loloni' nene lamine' ilihe ido' minevo'  
 alevo' o do vaa' akalo' e'metelove loloni' nene lamine' ilihe nemu'  
 nene ma gelamuve. <sup>23</sup>A'mine aka sita' memu' nene ve'nehe' ka'nehe' lo  
 nouve. Naza vo Kilisitokisi minaa' nene ivile' o neine' nenako ne'mine  
 olongumu' lanite' nene ha gele nouha <sup>24</sup>helo voloni' nene lingine  
 sihele'ni ne'mine gopo minilizani' nenako naza me misubou' oko'nesi  
 ha mineloni' ne'mo nene ivile' ogo lamine' oloseive. <sup>25</sup>Nemu' nene ti'  
 lo gele ele'vole' gehepeve ogo gele nouve: Naza nibili hilamavo lingine  
 monokumu' lutingu' gulomo avile lisivo minani' nesi nene do naba o'mo  
 vo minelongumu' nene lengi' mukikisi ha mine do vo minelesuuve losa  
 gele nouve. <sup>26</sup>Ido' ne'mino lengita gohi ogo mineloni' ne'mo nene lingine  
 nenikumu' ve li Izesu' Kilisito'ni nene vauve ilisa di naba i-dilizado'  
 minilisave.

<sup>27-28</sup>Ne'mine mana'mine inite' nanite' nanite' ne'mine soto' ilihe.  
 A'mingukisi lingine nene Kilisito' gamazi lamine' gilavete igi mili

minilizado' lisihe' o minine' monovolokovo' nene e'meti igi mili minilo. Ne'mine igi nizavo naza ogo ninge-lengedelohe ido' hota mino lengikumu' gamazi gelelohe oloni' nene lingine ongovango lamii ha lutine di hamo' i mini monoku' oti pehe li mini monoli'mi lovou' nene maka' makato' lutine gatine hamo' minivo biluva' i-lingidaa' avete ne'mine mana'mine inite' i-lingidilizangumu' nene lengehelele izamivo gili ele'vole' i nizani' gamazi lamine' di utilisa nene makato' amuzo mili nizavoo ninge gelelove. Ne'mine igi minilizani' ne'mo a'mine biluva' i-lingidaa' ave vi tolovo ilizangumu' nene ngelebizosa lingine lukuvo nalizangumu' nene lengelebizeleseive. Ne'mino soto' iline' nene O'moso'mo laavosa eitati' nene soto' oloseive. <sup>29</sup>Ido' ne'mine noluvoni' nene neemu' noluve: O'moso'mo nasahili' o-lengedo lingine igi mili ilizani' aka lehize-lingidine' nene lingine Kilisito'nimu' gili ele'vole' i minilizave losavo' lehize-lingidine' nevoba asi ei' Kilisito'nimu' nene mulumo alumo inite' nesi nene gihilizave losa a'mine ne'mine aka nesi nene lehize-lingidine' ve. <sup>30</sup>Ee, linginesi nene a'mine monoli'mi lovou' mene zege' zege' igi nizave. A'mine lovou' nene gomu' naza zege' zege' ogo novo ningani' ido' idisesi ha zege' zege' ogo novo gilani' lovo ma nene neive.

**Izesu' Kilisito' Ei' Oko'no Do'mo Lemo Zou Lo Minidi'mine Igi  
Lengi' Okodine Di'mi Limi Zou Li Mini Lengi' Zuhomu' Gilavo  
Lingivile' Igi Dizi Minilizave Lo Paulo' Line' Gamazi**

**2** <sup>1</sup>Ne'mino neine' nenako nemu' nene naza agae lo ti' lo nolo-  
lingiduve: Lingine Kilisitoda gi'mizi nizani' ne'mo hize ele'  
o-lengedavo ido' Kilisito' lulo limine' ne'mo nene lutine do upuhu'  
o-lengedavo ido' O'moso'mi Sikalahu' ne'mo lengikisi bizo neivo  
muludine hukavo mulumo'ine ningaa' monovo nene lingine di nilizani'  
nenako nemu' nene <sup>2</sup>naza nene nolize gehepeve izeloni' aka nene ma di  
soto' i-nidisa ne'mine igi minilo: A'mine nene ado' lingine lutine gatine  
di hamo' igivo' mini lutine ngemaal' monovo hamoto' e'meti ge luka  
neme ne lu'ne geme li mini lutine vo hamo' ogavo hamo' gatinevo' gili  
minilo. <sup>3</sup>Lengiku' nene lengikuti' ma ngivile' ogo minelone li okodine  
hazamu' di dizaa' monovolo' nene e'metilizavoba asi lengi' okodine di'mi  
limi mini lengi' okodinem'u' gilaa' nani' nene ivile' ivosa evene' mamu'  
gilavo dizo mineleseive. <sup>4</sup>Lingine hamo hamo' lengi' initetinemukovo'  
vise' igi minami lingine hamo hamo' evene' linge ma neti inite'inemukisi  
nene vise' igi hize ele' i-ngidi minilo. <sup>5</sup>Lengi' lengemeni damenitine  
nene mo Kilisito' emeni dameni've gehepeve me'minesi nene di minilo:  
<sup>6</sup>Ado' aza neve nene mo ganakuti' O'moso'mi emeni dameni gehepevesi  
minine'za aza nene O'mososi lisiheto' minine' mo'mosi've nene do gili'  
lo do minelove lo gelamo <sup>7</sup>a'mine amuzo've nene do hulo gelekele' ve

ne'mineti ngemeni dameni gehepeve do otuho evene' okode ne'minesi lolo' ine' ve. Evene' okode ne'minesi soto' ogo mino <sup>8</sup>ei' oko'no nene do leme gehepeve noogo O'mosolo' gelekele' ogo minine' nene O'moso'mo vo heleline line' gamazilokisi nene gele doosa hiline' ve. Ee, lohoto' zalo' bililizanguti' nene ovozo helo olovo' amo O'moso gelekele' o-do evene' mukiliti ve'nido' ve goloso gehepeve ne'mine lolo' ogo lohoto' zalokisi nene hiline' ve. <sup>9</sup>Ne'mine ingumu' nene O'moso'mo do'mo dizo dizo mo mo'mosi' nabalo' goloso hozine hulo-doo ei' gulive do hozi lo-dine' ne'mo nene gulive ato ato' muki' nene ngivile' ogosa minine' ve. <sup>10</sup>Ido' ne'mine ine' nene Okulumoku' nizani' initkisi misubolo' nizanikisi misubo lulou' nizanikisi mukito' Izesu' gulive lilizado' nene obuv'o'ine hizi imi <sup>11</sup>mukito' Izesu' Kilisito' neve nene Guvelesi ve naba neive li li soto' ilizave losa ne'mine ine' ve. Ido' Izesu'ni ne'mine i-dikevo ne'mo nene meleho O'moso ne'mi guvele nene voloseive.

**Nenito' Gelekele' I-nidi Mini O'moso'mo Do Lungu' Izeline'**

**Ne'mi Gihile Di Soto' I'mi Vi Minilizangu' Nene Sonohi'**

**Ne'minisa Ve'ne Ve'ne Ili Minilizave Lo Paulo' Line' Gamazi**

<sup>12</sup>Lu'ne lengeme nouvoni' alevekizo, Izesu'aza nene O'moso ne'mino gelekele' o-do minine' nenako nemu' nene lingine a'mine'mine igi gelekele' igi minilo. Gomu' naza lengikisi minuvongu' gamene gamene gelekele' i-nidaa' ani' ma'mine igi mini idise naza lengikisi minamuvodo' nene a'mine gomu' monovotine nene ivile' igisa gelekele' gehepeve i-nidilo. Naza ti' lo nolo-lingimuve: O'moso'mo do lungu' izeline' nenaze. Ne'mi gihile di soto' ilizangisi lengi' nene ladise ogalone li golise gili luvo luvo izi minisa nene amuzo mili gono dalo. <sup>13</sup>Ne'mine noluvoni' nene nanitekumu' ve. O'moso'mo gilivo lamine' iline' inite' olone li gilisa lingine a'mine inite' ilizado' nene do upuho' noo-lengedo asi've O'moso neve nene lengiku' omo mino gono nodave. <sup>14</sup>Nemu' nene lingine ne'mine mana'mine inite' igi mili minilizangu' nene nulu nulunga li lihiteheka li lovo lolize amisavo' nene igi mili minilo. <sup>15</sup>Ido' ne'mine igi minilizave lo noluvoni' nene nanitekumu' noluve: Lingine nene okodido' gamazi nomivo mini lutingukisi goloso monovo nomivo mini me misubou' aleve aka lisiheto' vami zovo' zava' izi vaa' aveti vovo'ningu' nene O'moso'mi izipahala zuho lengita goloso nite' ma gi'mizamine' minilizangumu' nene ne'mine ilizave losa noluve. Ne'mine igi mini a'mine me misubou' aleveti vovo'ningu' mene sonohi' ne'minisa ve'ne ve'ne ili mini <sup>16</sup>minevo' minevo' minaali'mi gamazi nene di hozi li minikevo naza loti' hazamu' izo minuvoni' nomive lo ido' amuzo molo gono hazamu' do minuvoni' nomive losa Kilisito' aline' gamenelo' nene lengikumu' lo soto' ogo nolize izelodo' minelesuve. <sup>17</sup>Neze nene nibili hililizahe gelamuha ne'mine ma ikevo vanise lepeloni' nene lingine Kilisito'nimu' gili ele'vole' iga'

naani' nene sipisipi O'moso imilisa bilaa' naani' ne'mino neivo a'mine nene lingine mo O'moso lehizi-di nizado' nen'i vanise'ne lepeloni' nene a'mido' imine' molo mineleseive losa nolize noizuve. Ido' a'minem'u nolize izeloni' nene lengi' mukikisi maka' lolize izelesune. <sup>18</sup>Ido' ne'mine oloni' nene lingine a'mine'mine igi longolize iziisa nenikisi makato' lolize izelonido' o neive.

**Timoteongi Epahaloditongi Nene Engita nGimiselelove Loosa  
Eng'i Monovo Danava'ine Paulo' Lo-ngimine' Gamazi**

<sup>19</sup>Naza lengi' nene nadii nizahe lo a'minem'u gelosa mulu'neu' lamine' gelelove loo Guvelesi ve Izesu' lulolo' noline' nene Timoteo'ni lengita nene lite' losa imiselelove losa gele nouve. <sup>20</sup>Ido' Timoteo'ni ne'mine nene nenikisi mela ma minamave. Asi ei' hamo' nene nen'i gelaa' nouvodi'mine ogo gilivo bizo minusive mino lengikumu' gehepeve ogo minelive ne neive. <sup>21</sup>Ido' linge ma muki' nete nene engi' inite'inemukovo' gili minisa Izesu' Kilisito' gono'vemu' nene ma gilisa'mave. <sup>22</sup>Ido' Timoteo' monovo've lamine' mamu' nene lingine mo gili nizani' ma neive. Aza nene nenikisi melehoi gipelei ne'mine lol'o' ogo mono' gamazi lamineto' nene gelekele' ogo do hutile' ogo minaa' nousive. <sup>23</sup>Ne'mino minaa' nousingumu' lengita imiselelove nene ei' ve losa gelo nen'i oko'nela inite' soto' iline' ma nene vo nadi' nadi' ilihe ninge minosa lite' lo lengita imiselelove lo giluve. <sup>24</sup>Ido' Guvelesi vemu' gele ele'vole' o nouvoni' nenako nemu' nene nen'i nesi mo lite' lo lengita alosuve losa gele mu'mus'i o nouve.

<sup>25</sup>Ido' nenikisi gono doo monoli'mi lovou' makato' zege' zege' ogo minusive leze zuho lengi' imislikevo ogo nasahili' o-nedo minaa' ive Epahalodito' nene naza lengita tine' molo vilido' o neive lo gelosa gohi lengita imiselelesa nouve. <sup>26</sup>Nene nanitekumu' ve. Aza lengi' mukikumu' nene gohi ningelove lo lulou' huhu lo gelo miningu' nene aza inite' gize do miningumu' lingine gilangumu' nene gelosa gala muki' goloso nogilive. <sup>27</sup>Ee, lamineto' ei' nene mo inite' gize do helaato' mine molani'za O'moso'mo do u' izine' ve. Ido' ne'mine ine' nene eikovo' ne'mine o-damive. Nenikisi nene geni geho mino a'minem'u mulumo gelo nouvongu' mene gohi mulolo kalolo' ogo mulumo gele-daline losa O'moso'mo nenikisi nene do nu' izive. <sup>28</sup>Ido' aza lengikumu' mulunou' huhu lo gelo mino lengikumu' gala muki' gelo minine' nenako nemu' nene lingine eze ningisa muludingu' lamine' gohi nigilavosa nezela mulumo minine' nene ngomo ilive lo gelo lengita imiselelongumu' lu'ne nene amuzo molo otavo imiselelesa nouve. <sup>29</sup>Ne'mine olosuze. Lengi' nene Izesu' Kilisito' zuholiti sunolo' e'meti longolize naba izi minisa ele'mize lamine' ilo. Lingine nene ne'mine vemu' gilavoo dizosa minelido' o neive. <sup>30</sup>Ido' ezemu' nene lingine gilavoo dizosa minelido' o neive

noluvoni' nene nemu' noluve. Aza nene lengito' medelo mino nen'i nene nasahili' o-nedelove loosa ei' minevo' alevo've hulo labuluvo ogo Kilisito' gono've hize ele' ogo miningu' nene hilinguti' hakaave.

**Okode Losuvo'mi Initeto' Gele Medelamo Mino O'moso'mi  
Sikalihuli'mo Hize Ele' O-lididi'mo O'moso Gubi' Ize  
Emo Izesu' Kilisito'ni Do Hozi Lo-daa' Nounive Netevo'  
Nene O'moso'mi Noso Do None' Nenako O'moso'mi Noso  
Molaakumu' Okodine Lolovo Hukilizave Laa' Avemu' Ehe' Igi  
Minilo Loo Paulo' Ei' Monovomu' Lo-ngimine' Gamazi**

**3** <sup>1</sup>Neze zuhokizo, gamazi nene mo gize lengemekuvoni'za ma neine'  
nene lo-lengemeloze. Gililo. Guvelesi vem'u nene longolize iziisa  
nene minilo. Gomu' lo-lingimuvoni' gamazi gohi gize lengemaakumu'  
nene naza giluwo gosele' nebelamive. Ido' gohi gize lengemeloni' meve  
nene leng'i gopo aka vilizadoti' nene alete molo-lengedeline' nenako  
nemu' nene ti' lo nolo-lingimuve: <sup>2</sup>Goloso gono daa' ave gulo ne'mine  
minavemu' nene ehe' igi minilo. Ee, Zuda veti monovolo' e'metisa  
O'moso'mi noso nomulube li Izesu' evenele leng'i okodine di goloso  
igi huki-lingidilisa laa' avemu' nene ehe' igi ningisa minilo. <sup>3</sup>Ne'mine  
noluvoni' nene neemu' noluve. O'moso'mi noso gihile neve nene leli'  
okode losuvo'mi initeto' nene gele medelamuba asi O'moso'mi Sikalahu'  
ne'mo hize ele' o-lididi'mo O'moso gubi' ize emo Izesu' Kilisito'nimu'  
lolize izo mino ezelo' gele medele minaa' nounive netevo' nene do none.  
<sup>4</sup>Okode losuvo'mi initeto' gele medelamuba nen'i nene oko'ne losuvo'mi  
initeto' ma gele medelelove lo giluvodini a'mine gele medelelodo'  
o minine' inite' nene nenita ha neive. Ee, evene' malite gele medelelono'  
o neine' inite' nene leli' okodela ma do none li gili nilizani' nene nen'i  
ngivile' ogo ne'mine lani' inite' nene vai' do nouve. <sup>5</sup>Ado' nemu' noluve:  
Naza nene soto' uvodoti' gamene seveni ogo vavo eitilo' nene O'moso'mi  
noso mili-nidi oko'ne lolovo huki hulani' ve. Ido' naza Isilaele' aleveut'  
Benizamin'i a'vopilemo' zuhouti' soto' uvoni' ve. Ee, ize'ne me'ne nen'i  
gidasive nene Hebilao' aleve minasine' nenako naza nene Hebilao'  
ve gihile ne nouve. Ido' Mose' lou' gamazi'velo' e'mete gehepeve igi  
minaa' ave Halisaio' veti muliseu' vo gi'mizuwe mino <sup>6</sup>a'mine Halisaio'  
monokumu' gilingili ogo minuvodi'mo nene Izesu' evenele zuho goboni  
mala' mala' o-ngedaa' uvoni' ve. Mose' lou' gamazi've ne'mo ve lisih'e'  
minilizave nete nene ne'mine ne'mine ilisaave lido' nene e'mete osu'  
lo naza nene a'mine lou' avuto' amo gamazi'ne nomine' minuvoni' ve.  
<sup>7</sup>Ne'mine ve minuvoni'za a'mine ne'mine monovo nete nene di naba  
i-nidilizado' o neive lo giluvoni' initekumu' nene naza alinge' Kilisito'  
evenele lolo' ogosa ga'ne giluvoni' nene mo haza nite' gehepeve lili' ikeve.  
<sup>8</sup>Ido' neeve' nomine. Naza Guve'nesi ve Izesu' Kilisito'nimu' ning'o gelaa'

ne'mo inite' muki' nene ngivile' gehepeve ogo inite' naba ve lo gelo inite' mata' mukikumu' nene giluvoo muki' nene haza nite' gehepeve lili' ikeve. Ee, inite' mata' mukikumu' nene giluvoo pipiza inite' gehepeve lili' ikevo Kilisito'ni nene do ti' olongumu' ve loo inite' mata' muki' nene huluve. <sup>9</sup>Ee, inite' mata' muki' huluvoni' nene Kilisito'ni do ti' ogo ezela mine molo minosa ve lisihe' lolo' oloni' nene lou' gamazilo' e'metosa nenitati' do soto' ogo lolo' olovoba asi Kilisito'nimu' gili ele'vole' iga' ave nene gili ele'vole' ikevosavo' nene O'moso'mo ve lisihe' lolo' o-ngedaa' neine' ne'mine ogo naza ezemu' gele ele'vole' okuvoo ve lisihe' lolo' o-nidivoo minelongumu' ve loo <sup>10</sup>ido' ezemu' ningi gelo hilinguti' otine' amuzo do neine' ne'mo nene nenitasi mine molo neivo mino aza gomu' mulumo alumo geni gehaa' ine' ma'mino nazasi nene makato' geho mino ido' eze hiline' monovo danava nene nenita minivo mino <sup>11</sup>nazasi helelonguti' ma otelodo' o minelongumu' ve losa inite' mata' muki' nene huluve.

**Hozi Okulumoku' Minevo' Minevo' Oga' Nene Dalohe Loo  
Dalongumu' Nene Amuzo Molo Loti' Izo Novuze. Neni' Ogo Molo  
Uvodo' Nene Ne'metilizave Lo Paulo' Lo-ngimine' Gamazi**

<sup>12</sup>Ne'mine monovo nenita minelive lo noluvoni' nene nenita mudise minavo O'moso'mo mudise do lisihe' gehepeve o-nedavosa noluvoba asi Izesu' Kilisito' aza neni' do ti' ine' nene ne'mine monovo do mineline losa do ti' o-nidine' nenako nemu' nene a'mine luvoni' monovo nene naza do ti' olosa a'minemu' amuzo molo do novuve. <sup>13</sup>Neze zuhokizo, a'mine inite' nene mo dokuve losa gele nouvoba asi inite' hamo' meve nene oga' nouve: Gomu' inite' mukikumu' nene mo hulo mehe'nela ogosa alinge' inite' ve'nela neine' inite' nene dalohe lo ahanga o do a'mida nene novo <sup>14</sup>O'moso'mo Izesu' Kilisitoda mine molo mino Okulumoku' hozi minevo' minevo' oga' iline lo elese molo-nidine' nene do gihile izo meni'ne ne'mine a'mine Okulumoku' minevo' minevo' oga' nene dalove losa daloni' makila nene amuzo molo loti' izo vo nouve. <sup>15</sup>Nemu' nene laza monoku' lodive ogo nonive nete nene idise luvoni' gamazi menemu' nene hamo' gatevo' gele lone. Ido' lengikuti' malite gatine atoli'mine ma gililizani' nene a'minemukisi nene O'moso'mo do lisihe' ogo lengelebizelesive. <sup>16</sup>Ne'mine oloseine'za laza monoku' mo gele none' gamazi nene do gili' lo mino a'mine gamazi gehepevelokovo' nene e'meto ogo molo mine do dizelonido' o neive.

<sup>17</sup>Neze zuhokizo, naza ogo molo oga' nouvodo' nene api'napi' igi mini leli' lengelebizuune' monovo ne'mido' e'meti igi mili minaa' avelo' nene ngamamaka mili ningi minisa nene a'mine'mine ilo. <sup>18</sup>Ne'mine ve nene ningi minisa nge'metilo noluvoni' nene neemu' noluve: Evene' muki' minani' neti monovo'inemu' nene mo gomu' gamene muki' longimuvoni' ve. Ido' idise nene mulumo'ine gelosa ve'ne novozo do'moze'

moze' neivosa engi' monovomu' nene gohi ti' lo nolo-lingimuve: Inginge  
igi mili minaa' naani' monovo ne'mo nene Kilisito' lohoto' zalo' hiline'  
mono' mamu' nene biluva' lili' i-daa' naani' gele neive. <sup>19</sup>Ne'mine igi  
mili minadot'i gihile've soto' iline' nene vo tolovo oga' ne neive. Engi'  
O'moso'ine neve nene oko'ine'mo lanite' gelaa' neine' inite' mata' muki'  
nene nene lili' ikeve. Inginge ngovozo hililizado' o neine' initekumu' nene  
oko'ine di dici mini lu'ine nene me misubou' initetokovo' mili minaa'  
nave. <sup>20</sup>Ido' Izesu' evenele leli' goto' numude nene Okulumoku' nenako  
inginge ne'mine igi minaa' naani' nene mo edamive. Ee, do lu' izelive  
Guvelesi ve Izesu' Kilisito' aza Okulumokuti' alingumu' nene gilingili ogo  
gizebo ogo none. <sup>21</sup>Ido' aline' nene inite' mata' muki' ezelo' do gelekele'  
o-ngedelido' o minine' amuzo've nedunu' nene idise mene nge lamine'  
misubou' okode nene do velepe' izo ei' oko'no atoli'mine ogo minine'  
ne'mine do otuho-ledeleseive.

**4** <sup>1</sup>Ne'mine iline' nenako nemu' nene neze zuho lu'ne lengeme mino  
lengikumu' oga' uvo aleve ado' mulu'neu' gulumo avile lisivo minaa'  
nouvo aleve ado' gono'netoti' gihile've gonolise nite' ne'mine do minelon'i  
alevekizo, ongovango lamii Guvelesi vela ele'vole' igi gi'mizi gili' li minilo.

#### Ogo Molo Minaa' Monovomu' Lo nGolo' Lo Paulo' Lo-ngimine' Gamazi

<sup>2</sup>Gaza Zuvodia' nesi ido' Sidike' gei' nesi lingine sitato' nene Guvelesi  
ve'mi evenele nizasine' nenaze. Lutine gatine di hamo' igi minilisive lo  
gatine do agae lo nolo-lingimuve. <sup>3</sup>Ee, ido' gono maka' daa' usive gihile  
geita nene ti' lo noluve: Alungo netise Izesu' gamazi lamine' nene di  
otilisa monoli'mi lovou' nene zege' zego' igi minasine' nenako nemu'  
nene gaza uva li di bilihisi. Hize ele' o-ngedelesane. Ee, inginesi  
nenikisi Kelemedokisi ido' gono maka' daa' unive linges nene makato'  
mono' gonou' nene zege' zego' une' ve. A'mine aleveti gulive'ine nene  
O'moso'mo minevo' minevo' ngemeni dameni ngemeliveti gulive'ine  
gize molaal' neine' buku'veu' nene gize neive. <sup>4</sup>Ido' lingine gamene  
gamene Guvelesi vemu' longolize izivo' minilo. Ido' gohi ti' lo noluve:  
Longolize izivo' minilo. <sup>5</sup>Hongu livo' minaa' nani' monovotine nene  
ningilizaze. Evene' mukita di soto' igi ngelebizilo. Guvelesi ve nene mo  
avito' organaze. <sup>6</sup>Inite' mukikumu' muludine otavo gituhu' namii mini asi  
a'mine inite' mukikumu' nene O'mosola li voku' laa' igi ido' isaa' neve  
laa' igi mini inite' mamu' longo' ilisa gilani' initekumu' nene O'moso  
li-imaa' igi minilo. <sup>7</sup>Ne'mine ikevo Izesu' Kilisitoda gi'mizi nizani' ne'mo  
O'mosolati' hongu monovo've ado' leli' evenelitesi gelaa' noune' nene  
ivile' goloso ivosa atoli'mine neine' ne'mo nene lutido' gatido' nene alete  
molo-lengedo gizebo oloseive.

<sup>8</sup> Neze zuhokizo, gamazi ado' meve nene ma lo-lengemelouze. Gililo.  
Lingine minilizangu' nene monovo lamine' goloso ado' evenelite di hozi

lilizado' lisihe' o noline' monovo nevo'minemukovo' nene gatine gilisa minilo. A'minguti' linge neve nene ado' inite' gihile laminekumupe inite' lisihe' gehepevemupe golososi minamine' initekumupe ninge lamine' daa' initekumupe inite' guvele laminekisi neine' initekumupe nevo'mine initekumukovo' nene gilisa minilo. <sup>9</sup>Ido' nen'i apize lingimuvo nenitati' dani' monovosi ido' nen'i noluvo gilani' monovosi ido' ningi nizavo ogo molo uvoni' monovosi nene lingine di gono veleu' mili igi mili minilo. Ne'mine ikevo hongu lo lamino minaa' monovo do soto' o-ledaa' neine' O'moso ne'mo nene lengikisi mine molo minelive.

**Paulo' Ebe' Mau' Galapusolo' Vo Neivo Hilipi Alevete Noso' Nitkisi Ido'  
Initekisi Nevo'mine Imangumu' Isetine Ve Lo nGopo'n Line' Gamazi**

<sup>10</sup>Lingine gamene ha'na ha minisa nenikumu' gili nizani' monovotine nene gohi di soto' ani' nemu' nene Guvelesi vela nolize naba noizuve. Lingine gomu' nene nenikumu' gili minani'za a'mine nenikumu' ha gili minani' di soto' ilizani' aka nene ma soto' o-lengedamive. <sup>11</sup>Naza ne'mine mana'mine inite' soto' o-nidivoo mineloha a'mine ne'mingukisi nene lamine' minaa' monovo nene mo ningi otohato o nouvoni' nenako nemu' nene naza nolize noizuve noluvoni' nene naza initekumu' ma vise' ogosa inite' ma hize ele' i-nidilizave losa lamuve. <sup>12</sup>Gamene ma inite'ne nomivo vise' oga' uvoni' ve. Ido' gamene ma nene inite' mata' vai' ha neivo minaa' uvoni' ve. Nemu' nene ne'mine mana'mine ogo minaa' monovomu' nene mo otohato ogo mino mo hizo gele nouve. Ado' naza inite'ne vai' logavo gatu'ne ivosavo' minelohi ido' inite'ne nomivo vise' ogo ga'na helo minelohi olongukisi lamino minaa' monovo nene mo otohato ogo gele nouve. <sup>13</sup>Ee, nanite' nanite' soto' o-nedelihe a'mine mukiku' nene do amuzo molo-nedaa' ive Kilisitoda nene lehete o mino ele'vole' ogo ha ogo molo minelodo' o nouve. <sup>14</sup>Ne neiha lingine initedunu' hize ele' i-nidadi'mo nen'i geni'ne gihuvgongu' nene makato' lengikisi gihuune' giline' nenako lingine monovo lamineto' e'meti ne'mine ani' nene mo lamine' ve.

<sup>15</sup>Ido' Hilipi alevekizo, langisetine nene mo gili nizani' ma neive. Naza gana' ogo Kilisito' gamazi lamine' lo-lengemo minuvodoti' a'mine Makedonia misubotine hulo vuvongu' nene mono' mulise malitesi mono' gono'ne dalongumu' hize ele' i-nidi moni ma nimavo duvoni' nevoba asi lengikovo' nene ne'mine igi inite' nimavo nenikisi gono maka' gihuune' ve. <sup>16</sup>Ee, olihe misubo mala vamo ha Tesalonika numuno ebata minuvongukisi vise' uvo inite' nene leng'i ma huli-nidi hize ele' i-nidani' nene gamene hamokovo' nevoba asi gohi gohi ne'mine ani' ma neive. <sup>17</sup>Lingine inite' ma nimilizave lo gele noosa noluvoba asi inite' ma nimikevo ne'mi gihile've nene vo naba ogosa a'mine gihile nene lengikumu' ha ize-lengede minelive lo gele minosa noluve. <sup>18</sup>Ne

neiha inite' muki' naza vise' uvoni' votigile nene ivile' ivosi mo do osu' lokuve. Lingine huli-nidani' inite' nene Epahalodito' do nemavosa nen'i votigilelo' nene vo dosa vai' lave. A'mine huli-nidani' inite' nene unuvo laminekisi inite' O'moso'mo ninge lamine' do mulunou' lamine' gelelido' o minine' inite' ne'mine nene lehizi-dave. <sup>19</sup> Ido' lingine Izesu' Kilisitoda gi'mizi minangumu' nene O'moso'ne ne'mo nene inite've atoli'mine ogo vai' goloso lo mininguti' nene lingine vise' iliza initeto' nene vauve elo golo hizo lengemo mineleseive. <sup>20</sup> Ido' meteho O'moso ei' opo'ni lo'mo vo minelone' nene osu' lamo mine do voovo' minelive. Mo ne'mino minilihoo.

**Gamazi Gize Osu' Losa Paulolesi Maka' Minavete  
nGopo'ni Lani' Gamazi Gazine'**

<sup>21</sup> Naza Izesu' Kilisitoda vi gi'mizi O'moso'mi evenele lili' ave nene ngopo'ni noluze. Li-ngimilo. Leze zuho mela nenikisi maka' nonive nete longopo'ni nilaze. Li-ngimilo. <sup>22</sup> Ido' Izesu' evenele muki' nete longopo'ni nilaha engikuti' guvelesi ve naba Kaesale' numungu' minaa' ave nete nene longopo'ni naba goloso nilave.

<sup>23</sup> Guvelesi ve Izesu' Kilisito' nasahili've nene lengi' lutingu' mine molo minivoo.